

四庫全書

集部

欽定四庫全書

集部

文苑英華卷四百

十七至
二十一

詳校官庶吉士臣柳邁祖

助教臣常循覆勘

總校官進士臣朱鈺

校對官中書臣鮑之鍾

校對官中書臣胡紹基

謄錄監生臣許紹錦

謄錄監生臣劉耀馥

欽定四庫全書

文苑英華卷四百十七

宋 李昉等 編

加階

加階

授宣城縣令儲孝任等加階制

李 嶠

鸞臺朝議郎行宣州宣城縣令儲孝任等並早從推擇
久著勤勞績茂綰銅時逢檢玉千齡有慶既屬休符百

里能官宜從榮獎可依前件主者施行

授右衛親府中郎將裴思諒等加階制

前人

鸞臺宣威將軍守右衛親府中郎將檢校左羽林衛上柱國裴思諒等八屯五校俱奉職司三垓九筵咸屬休慶錫以班秩用存優獎可依前件主者施行

授通州刺史于光遠等加階制

前人

鸞臺中散大夫使持節通州諸軍事守通州刺史于光
遠並資才藝咸剖符竹勤勞有積聲望俱優神岳貢金
明堂會玉頒賞行慶宜加恩獎可依前件主者施行

授皇甫翼等加階制

張九齡

門下朝請大夫檢校尚書左丞上柱國皇甫翼等才有
國良望為時重或紀綱會府成司直之名或彌綸列曹
得在公之譽屬禮崇齋祭慶洽衣冠宜加等級之恩用
廣殊常之賜可依前件

授張均等加階制

鄭少微

門下中大夫行中書舍人張均等並藻珪璋騰華綸綍
文行致美駁議惟精肅侍嚴禋咸稱慎禮宜覃行慶之
典俾承加等之榮可依前件

授李逢吉章秘等加階制

元稹

門下某官李逢吉是朕皇太子時侍讀也忠孝之訓何
嘗忘之惟祕洎璫實惟藩臣克壯威猷以固垣翰楊造
等祇事內外夙夜惟寅並沐前恩遞昇榮級上下有等

式示彛章可依前件

授崔元畧等加階制

勅崔元畧等階之設二十有九有庸有事有叙有加用是四者以詔百吏由郾而上至于元畧曰加曰叙由瀍而下至于弘景曰事曰庸光我侍從之臣且優致政之老詔賢詔德於是乎在堂與益近爾其敬之可依前件

授高元裕等加階制

崔 嘏

勅國之肆青必有霈澤所以惠及於下也爾元裕國之

重臣守我封部能以惠化富吾疲氓其地分内外之任
盡勤勞之誠皆以所能舉其官業是用因茲大慶錫以
崇階各敬爾儀無忝休命可依前件

授內諸司及供奉官叙階制

勅設堂陛所以辨等威置階級所以彰貴賤苟可授者
吾無愛焉爾等或司我繁重夙夜無違或侍吾左右勤
勞不懈而皆溫和植性廉潔終身方將委以腹心豈止
加於爵位爾其率職以事上用降以持滿勿以貴而驕

人無以高而自忽保茲貞吉以永休光可依前件

授韋慤裴識等加階制

勅記曰爵人於朝與衆共之蓋以階級既崇寵榮斯異
疏封錫命列土承家爾等或才推粉澤豈唯五字之工
或任重藩垣自茂一方之績或官居象月或位應列星
或擁緹騎而分九衢或奉瑤墀而總六尚皆聿脩官業
克紹家風爰因慶澤之辰更舉山河之誓宜思帶礪永
保簪裾可依前件

授李駢等加階制

勅慶澤可以示恩榮貴階可以顯勞績至於叙進則有
彛章況爾等咸以儒業更能累更事任久而益茂志且
不渝方承覆簣之勤宜錫崇基之漸封妻蔭子斯足為
榮可依前件

授孫簡等加階制

勅上造出秦中消自漢古所以叙武功今所以寵文德
施恩布澤今古同途爾等皆道光儒業任重藩維才膺

歷試之難德茂歲寒之操或卿曹副貳多推幹用之方
或正殿贊揚共許詳閑之美况橋山奉職鶴禁來儀既
讐事往之勞亦舉優賢之典河山在目帶礪為期克保
初終永光胄緒可依前件

授盧弘正加三品階制

勅夫門交榮戟身耀金紫抱孫可蔭顧室增封自非峻
級崇階其何以致爾等或以強學潤已武畧登壇或望
重瑣闥輝華於粉署或道光憲席輔相於青宮或以長

才累更重任或以吏道久領郡符用則殊途事皆一致
爰因慶澤以布恩榮勉思階級之高無忽柔謙之誠可
依前件

授朱克柔張戎等加階制

薛廷珪

勅具官某等外諸臣有政事可以稱家父位尊功大不
求聞於時者可謂能處其身而協進趣之道矣而師保
元勳燕居轍下以遺落之材廣朕聞聽亦深得大臣之
體裁一作哉惟茲二事朕實樂聞爾克柔能以政經葺吾

舊許人蒞俗遠至邇安而我前佐大藩休有淑問盤錯
斯驗鋒鋌有餘或嘉韜櫓之心或允求伸之志大臣子
弟朕豈無私元勲薦揚朕豈不信上公進律少將通班
階序徽章旌別優異惟爾克柔與戎宜知朕寵待汴帥
全忠與太保鋌之意而勉於從政立朝也可依前件

開府

授王仁皎開府儀同三司制 蘇頲

門下后族之榮況有資敬台儀之重允膺是求特進王

仁皎盛門華緒當代賢戚不言而自有陽秋從信而罔愆風雨軒星作範已寵於金穴魯管增輝更芳於玉樹
三事斯擬百工式瞻俾延椒臺之祥宜助槐庭之理可
開府儀同三司主者施行

授李抱玉開府儀同三司制 常 衮

門下秉德者必先於冲讓報功者亦資於禮秩遂其所
執以彰明哲之心存其所賞以稱勲賢之策一作業則勞

臣知勸羣議允從兵部尚書同中書門下平章事潞州

大都督府長史知鳳翔事充陳鄭澤潞觀察處置等使
仍充南道通和吐蕃秦隴淋疑洮以來觀察處置等使
上柱國李抱玉風雲所感挺此人傑文武相濟弼于朕
躬竭股肱而宣力敷心腹而納誨道高可以諮訪言惠
可以底行鎮撫四夷旌麾授其二柄決勝千里法令齊
於一人端誠馭衆律畧安邊究詩書之義府脩德刑之
戰器故使剛者有禮勇者有方三軍可用九伐皆尅西
戎卽叙中夏底寧而又精心吏職諭我朝旨茂周原之

多稼省隴成之外徭老少安懷遠邇和洽社稷之衛邦
家之光嘉乃丕績肆于時夏冲而不盈泰而彌損累執
范宣之志不言馮異之功辭禮閣之端右罷王畿之戎
號足以光昭史冊軌度縉紳今之儀同未曰優異以其
遜職是有進階式從彛序無替成命可開府儀同三司
餘並如故

授鍾庭光開府儀同三司制

勅鳳翔節度下歸順羗首領部落副使保寧州都督特

進守右羽林軍試太常卿鍾庭光夙承勲望早勵誠勤
自屬艱虞備申効用既臨危而見節亦因事以成功率
先歸懷丹款昭著益表自新之志允茲從重之賞禮優
八命秩比三司宜茂寵章式酬勲則可開府儀同三司
餘如故

授李秀璋開府儀同三司制

勅儀亞槐庭寵分茅社議功而賞舊典斯存河西觀察
判官特進檢校左散騎常侍兼泗州刺史上柱國李秀

璋議慮深遠理懷明濟勁節不奪長才有餘湟中絕塞
久毗戎幕車師前部仍領藩條萬里孤軍十年連戰主
畫以貞師律推誠而得士心摧兗陷堅勝捷相繼軍吏
緩帶邊人反耕緬思忠勞益用嘉歎宜進秩於八命更
褒封於五等可開府儀同三司仍封隴州縣開國男餘
如故

授張自勉開府儀同三司制

勅淮西節度都虞候特進試太常卿上柱國張自勉體

仁以成勇狗節以臨戎職在刺奸威屬整旅齊軍令之
進退明師律之否臧南清江黃北啓申息邊虞載戢亭
候肅然舍爵議榮實居其右承景風之章叙比公府之
命秩可開府儀同三司餘如故

授論誠信等開府儀同三司制

前人

勅大將軍論誠信等咸有將才早彰臣節或往叅締構
業著總干或近歷艱難勲高負勒錄功行慶啓號覃恩

宜疏五等之封更寵三司之任誠信可開府儀同三司

授杜冕開府儀同三司制

門下禮優八命秩比三台名器之崇勲賢所屬特進試
太常卿使持節鄜州諸軍事兼鄜州刺史御史中丞充
鄜坊等五州都防禦使上柱國鄭國公杜冕植性剛毅
立心忠烈夙有將帥之才早知軍旅之事任當禦侮政
在親民守七德以臨戎頒六條而訓俗地臨上郡時屬
多虞軍令惟行高懸賞罰之柄王師所處不敗商農一作

不敢傷農恐誤之業戎軒屢捷郊壘用寧制勝功高緝綏課最加以命數抑惟典常可開府儀同三司餘並如故

特進

授阿史那獻特進制

蘇頲

黃門建官制爵立化之本樹善崇功惟能是任招慰十姓兼四鎮經畧大使定遠道行軍大總管北庭大都護瀚海軍使節度巴西諸蕃國左驍衛大將軍攝鴻臚卿上柱國興昔可汗阿史那獻凌鉄關之遠塞威揚萬里

雄金山之舊族誠竭累朝每讀古人之書且多奇士之節豈止旻侯忠孝呼韓脞緒而已哉頃服獫狁綏其種落茂勲則遠已寵於登壇厚秩未加俾榮於開府亞台之典羣議允集可特進餘並如故主者施行

授李林甫特進制

門下王度以貞實寄於良輔天秩有禮允歸於盛德光祿大夫尚書左僕射兼右相吏部尚書集賢院學士脩國史上柱國晉國公李林甫應期致用命代生才禮樂

形於物範文章表於王佐自登袞職一紀于茲啓沃之
謨酌泉源而不竭忠公之節貫霜雪而罔改彛倫攸叙
庶績其凝實賴予弼用熙帝載猶且謙冲夕惕兢慎日
嚴問溫樹而不言履薄冰而逾勵久而益著德則茂焉
近者禮屬交神恩當進秩雖允恭克讓徒有固辭而惟
器與名本無虛授宜昭寵數以鎮崇班可特進行尚書
左僕射兼吏部尚書主者施行

授李光顏加階并賜一子官制

元 積

門下朕聞有天下者道德仁義以為理城郭溝池以為
固故曰不教人戰是謂棄之有備無患可以應卒此先
王毆攘戎狄保障黎元之大畧也五原居宥夏靈慶之
中當蛇豕豺狼之窟將搤咽喉之要爰授集作命腹心之

臣厥有成功宜加茂典邠寧慶等州節度觀察處置等
使金紫光祿大夫檢校司空兼邠州刺史御史大夫上
柱國武威郡開國公李光顏氣敵三軍心師百行有卅

莊之勇守之以仁有日碑之誠濟之以武叱咤則風雲
迴合開宴而罇俎周旋蓋文武之全才真古今之良將
是以淮蔡之役百勝功高青齊之師一面居最朕以蕭
關尚警馬嶺猶虞五餌之詐可羞百雉之防爰度先是
屬役每難其人惟爾良能果諧予願程功而不愆于素
訖事而不勞于人比命有司褒乃實効僉曰古諸侯勲
德優盛則就加特進以寵之我國家封植崇重則有朝
請一子以異之予嘉乃勤兼用兩者茲謂上賞爾惟欽

哉可特進仍與一子正員四品常叅官餘如故主者施行

授張濬特進守右僕射依前充諸道租庸使制

錢珣

勅古者建官取諸垂象故左右執法附於文昌以揔六

卿以提庶政用人之本邦國繫焉

一作興邦國焉進賢既協於

嚮公致理詎宜於虛位具官張濬剛而能斷寬則有容保和而實孕元精索隱而若陳洪範他山攻玉鮮類禹

珪九牧貢金自成周鼎先皇帝爰立作相朕小子圖任
舊人每親夾輔之才且致勤行之道必將率衆由已化
兵為農載胡越以同舟混車書於外戶志所未就我實
盡知經營向在於四方親附未遺於百姓雖聚財之任
不欲允煩大臣而復國所資安可有稽征賦荐居端右
兼陟崇階得名器之所歸在典章而斯重永期弘濟更
集前功可依前件

授河東節度副使檢校司空

一作徒

王瓌特進制

前人

勅為國之政在蕃有條贊立武於中權屬好謨於副介
具官王瓌河汾之氣當萃爾家欒范之宗亦高他族伯
仲繼撫封之盛子孫承錫命之功爾能績彼勲名主於
忠信遠取而寧規勇爵深思而但顧良弓列羣后之上
卿處前人之許一作典國尊獎之道造次必論心或益恭
諒蕃昌之可保性能召福何富貴之不來朝舉寵章事
歸敦勸方布冊勲之澤俾崇馭貴之階善佐永圖以承

厚渥可依前件

授沁州刺史張漢瑜加特進封開國男食邑制

前人

勅具官張漢瑜等漢室勲勞始以進奉朝請而好爵之
設五等具焉至於任以專城秩叅環衛假之有寵一作典

典一作寵

亦匪輕漢瑜以致勇之誠臨戎罔憚且能抱節

而後立功則良將之才挺然可見宗裕耻同兒戲學在
師貞過庭有聞刺部甚美則愛子之號昭然可知是以

詔我代言俾茲申命亦用垂勸期于徇公可依前件

文苑英華卷四百十七

欽定四庫全書

文苑英華卷四百十八

宋 李昉等 編

內官

內侍省

授吳承倩內侍省常侍制 常袞

勅漢置十二卿其一尚禁中之事所以司正伯之訓奉
詔奏之嚴高選令才俾之叅掌具官吳承倩行本於孝
性周於仁直而能溫和而有節文以禮樂達于典章自

晦吉人之辭深得侍臣之體久在樞近通乎宥密順以聽命未嘗越思咨而後行動不踰矩志全金石之固事絕絲毫之嫌勤職有功靜專端一往逢多故亦既居難遐想純誠近從賜服雖酬其効未獎其能省之貳官秩比千石想茲寵授念爾忠勞可內侍省常侍

授劉處宏通議大夫內侍省監充客省副使制

薛廷珪

勅內省華資司賓重任宮朝之選歷代攸難我今得人

爰舉茂典具官劉處宏冰霜勵操松桂騰芳弄筆硯以
飾躬考詩書而勵行遂為端士自闢亨衢在公馳幹事
之名銜命得使臣之體輩流推許達我聽聞宜示優恩
以旌脩整況遐方即序重譯來庭尤思周敏之才用副
綏懷之旨兼榮內省仍進崇階敬佩寵光往供乃職可
依制誥

授通議大夫行內省侍張建方起復本官制

李 璣

勅張建方古之孝子有為祖母而行服三年者雖有異於禮經而見稱於史筆緊爾至性過絕常流欲追昔賢信為高行然自東西漢以後南北朝以來大臣奪情固已多矣蓋以代更文質事有變通若皆徇私懷則誰當王事況爾職業至重委藉方深宜達奉上之規用叶得中之理從我曉諭是合章程可依前件

授吳承贊朝散大夫內侍省內侍伯判內給事

制

勅吳承贊早負器能累更職任清貞自立正直不回加
以溫故知新鉤深致遠雅好六經之旨旁求百氏之言
以此為官何官不理以此為事何事不行是用稱之清
曹委以重務俾其稍展扶搖之翰用彰千鎔之鋒無自
晦藏副我精選可依前件

內謁者監

授牛仙童內謁者監制

孫逖

勅奉議郎行內侍省奚官局令護軍牛仙童脩身淑慎

從事忠公夙夜惟勤出入無悔不有賞善何以勸能宜
進官榮且增章服可內侍省謁者監仍賜緋魚袋

授劉惠通內謁者監制

元稹

勅宣議郎內侍省宮闈

一作開

局令賜緋魚袋劉惠通愿

吾愛之俾在左右將我密命達于四方去盡行人之詞
還致諸臣之復言必忠信事無尤違使朕不出戶而知
三軍之事者爾有力焉深念其勤將以為報

一作將階
有以報

秩兼進用示恩榮各依前件

授劉泰倫起復內謁者監制 白居易

勅朝議大夫

集作郎

前行內侍省內謁者監上柱國賜紫

金魚袋劉泰倫古有中涓謁者皆侍奉親近之臣也今之寵秩亦由舊焉況泰倫有行義可以飾身有材幹可以掌務監臨內署朝請中闈謹密端和甚宜厥職久於其事兼之實難宜加進秩之恩仍舉奪情之典勉承獎任勿替初終可起復朝議大夫行內侍省內謁者監授孫孟宣朝請大夫內侍省內謁者監等制

李 磻

勅孫孟宣等並廉正操心溫茂成器自領職務皆著能
名無纖瑕可指於羣倫有嘉績可書於史氏聲譽既洽
階秩宜遷噫爾有高才我有高位更宜升進勿自緘藏
可依前件

授閣門使李全績中大夫行內侍省內謁者監
等制

勅李全績等夫榮叅禁署光總內朝贊文武俾不失威

儀導君臣令無所壅隔永言斯任諒在得人以全績等
行潔心貞神清氣爽加以洞達名法明解典章不以富
貴驕人不以才能傲物居然重器迥出常流自領職司
並彰殊効是用不移所任加以官榮無忘操持更俟遷
擢可依前件

局丞令

內局令判內僕丞

授掖庭局丞賜緋張嗣復內局令判內僕局丞

制

劉崇望

勅具官張嗣復性推端慎才任公方居為勵已之能動
有逸羣之度爰當職局備覩通明諒此精脩諧於擢用
是命伸其寵獎延以上司俟典幹之繼聞顧優崇之何
遠敬思勉勵跂及騰翔可依前件

授孫可讓內僕局丞制

勅孫可讓才質相高謙和特立秉端正

一作厚

恭敬之禮

一作體

備起居左右之勤入用甚優

一作多

前途更遠實諧

獎進俾列官司勉副寵榮無忘夙夜可依前件

授奚官局丞上柱國西門廷暉掖庭局丞制

前人

勅廷暉出入禁門周旋賓

一作宥

地恭謹之心無失公忠

之節愈明必有才能可當委用勉荷特遷之命宜思與進之途可依前件

授儒林郎內府局丞賜緋魚袋楊復隨給事郎

行內侍省奚官局令制

勅具官楊復隨資於周敏濟以器能居廣衆而和光列

禁司而幹務播於公議實曰上流諒檢操之不渝顧津途而莫測允承嘉命勉副寵遷無違恪恭以就光大可依前件

授楊魯潛內侍省內府局令制

李 璣

勅楊魯潛萬方兵革之時所難者道路九府困乏之日所切者貢輸而魯潛不顧艱危任當使命俾其琛賁得至賞錫粗行嘉爾勤勞合為遷轉可依前件

內官加恩

授劉全禮等七人並除內侍省府局丞置同正

等制

杜牧

勅賜緋魚袋上柱國劉全禮等置在傍側皆有才能既歷歲時合當班秩各宜敬恭職祿不懈忠勤可依前件

授內官加階爵制

崔嘏

勅惟善是求有勞必報命其開國賜以崇階轉遷於禁掖之間優寵於樞機之地我有成命爾其敬之具官某

等周旋左右出入宮闈盡誠敬於寸心守真廉於直道
皆能介然自處蔚有休聞念其歲月之勞被以寵章之
美宜思奉國永保宜家可依前件

授內官劉益謙加官制

薛廷珪

勅具官劉益謙惟爾叅我樞近之務副我腹心之求允
謂才難克彰試可委任斯重端莊有聞冰清繩直潔已
蒞事數馬而對問樹不言稽爾秉持稱吾宥密是用升
之峻級寘被崇班且酬職勞式示殊寵宜保優異勉圖

始終敬慎不愆必致遠大可依前件

授內官晏希伯加官階制

勅內官晏希伯內外之任必惟其人遷擢之恩允屬試
可以爾南珪無玷東箭有筠山明見松雪之姿天靜聳
嵩衡之勢詩書內積儒雅外彰聞其恭勤可委事任階
秩並進睠矚斯深勉服寵光往勵職業可

授內官張居翰等加官階制

勅具官張居翰等守道立身執忠事任造次不違於善

行錙銖必本於彛

一作典

章藏器未伸彈冠待進吾今知

爾爰用加恩升階序而遷品秩振堙沉而示恩澤唯爾
居翰勉於致身往服寵光匪懈夙夜可

授內官馬從朗加官階制

勅設階陞所以示堂輿之嚴正品秩所以明躋陟之漸
也率由次第以序忠良苟當其人吾必與進爾從朗止
水藏鑒壺冰孕清蹈禮樂以脩身耽詩書而養志夜親
墀廡拱辰之列宿分華曉近冕旒捧日之卿雲配潤動

必中矩行無越思歷試可觀序遷惟久九重華省三品
崇階用酬爾勞往馭其貴惟爾從朗服吾寵光立事檢
身所宜匪懈可

授學士使却文晏將軍金紫光祿大夫制

前人

勅國家設翰墨之林延髦碩之士以潤色鴻筆發揮王
猷妙選內官脩辭立誠者以與我言語侍從之臣朝夕
遊處膺是東拔實惟重難而具官文晏常夢綵毫亦吞

文石富有事業志於討論孔光之問樹不言石慶之數馬而對濯濯春柳風標迥出於葦流落落長松節槩不移於霜霰自擢居密署言奉詞臣所為當材且聞稱職縻之好爵貴則號其將軍峻以崇階勲莫重於光祿敬承寵渥往蒞清華率由此途以至崇達惟爾文晏得不勉之可

授內官劉重遇加階官制

闕

授內官王可方加階官制

勅出膺使命入奉宸嚴惟茲束求允屬心膂爾可方將
命而去成功以還別利器於盤錯之間驗潔矩於脂膏
之際試可斯驗愿吾愛之俾其序遷並謂至當徵還內
省冠以豐貂惟爾可方勉圖懿効可

授內官馬昌裔加官制

勅昌裔叅我樞機奉吾指顧能慎密以植志端莊而飭
躬動畏四知潔無貳過委注斯久霜雪不渝職勞可酬
序進惟允升其階秩示以優崇爾往蒞之益敬其事罔

懈砥礪稱予渥恩可

授內官張禹珪加官制

勅張禹珪本以端莊飭之儒雅鵬鶚負橫秋之勢梗枻擢構厦之材蘊是器能在予左右歷試事任亟涉光陰聞其恪勤宜示優獎階級秩序俾之俱遷服我新恩保爾懿効雖覆一簣古人有言爾宜知之勉自勗率可

授內官孫昭裔加官制

勅昭裔千鎔銛鋒驂騶逸步文之以禮樂飭之以詩書

白玉無瑕朱絃讓直拱我宸極祭如華星慎爾樞機不
對溫樹歷試茲久其材益彰移之崇班加以峻級且旌
優異用激端脩敬怠不同崇高可致惟爾昭裔知予意
焉可

授內官劉繼明王思齊驍衛將軍加階制

李 磻

勅朕每思中興深念庶政至於近密之任尤資忠讜之
臣凡所擢居莫非精選具官劉繼明等並介潔自持而

器能相比各於職掌並著聲名論功考績之時既無差異加寵進階之日豈可偏私勉務殊榮更期超擢可依前件

授內官韓坤範等加恩制

勅榮居近密任揔重難居

疑

上之恩渥則殊而人臣之

敬忌尤切其有端靜無失進退可稱而復以幹能彰於

官業名隨位進行與才兼不有異

一作日亦

遷何示獎勸宣

徽小馬坊使某潔矩操心溫潤成器剛而不暴柔而不

回宣徽舍光使某本於誠明文以禮讓止而不滯行而
不流起復宣徽南院副使某明見事情智通微妙光而
不耀晦而不幽皆調金玉之聲並秀松筠之色至於績
效實為著明嗚呼守職奉公爾既盡其節矣崇階厚祿
吾豈利於印哉可依前件

授內官韓龜範加官制

勅龜範代濟功勲志懷忠烈部領琛賁貢奉闕庭踰玉
壘之艱越銅梁之險績效斯異爵賞宜加况奉職可謂

歲深處衆獨聞位下不有升陟何謂勸能可依前件

授內官董全珙等除諸司副使制

前人

勅董全珙等副貳之重其來尚矣雖古之列國小侯繼
好一使猶尊命介以應事機況我大朝命官而中禁分
職貴惟密邇務極繁難若不優以崇班何以責其所任
以爾等並懷忠亮盛蘊器能名節不變於風霜勤勞仍
彰於歲月況今方馳鴻霑合為升遷示以新恩雅符故

事可依前件

文苑英華卷四百十八

欽定四庫全書

文苑英華卷四百十九

宋 李昉等 編

命婦

國夫人

封姚崇妻鄭國夫人制

蘇頌

黃門兵部尚書兼紫微令監脩國史上柱國梁國公姚
崇妻滎陽郡夫人鄭氏滎河地緒簪組家聲輝相門以
才淑冠邦族而婉孌蘭儀蕙問式備言容習禮聞詩載

兼圖史金彛作輔爰開土宇之封石窳承榮宜表珩璜之盛可封鄭國夫人主者施行

封牛仙客妻王氏幽國夫人制

孫逖

門下卿之內子實著於禮經國有舊章亦褒於淑德銀青光祿大夫守工部尚書同中書門下三品持節朔州節度使度支營田鹽池押諸蕃部落副大使上柱國幽國公知門下省事牛仙客妻瑯琊郡夫人王氏道膺圖

史言成箴誠賢明自遠柔惠兼資作配台臣能修壺教
寵其車服已膺命婦之榮錫以山川更表從夫之貴可
封幽國夫人主者施行

封李愬妻韋氏魏國公夫人制

元稹

勅夫尊於朝婦貴於室由古道也安有邦君之妻而無
湯沐之地乎況魏博等州節度使特進檢校左僕射同
中書門下平章事涼國公李愬妻韋氏德宗皇帝之外

孫也笄年事愬克有令儀夫蔭雖高猶執婦道持其門戶使愬有姻族之和奉其蘋蘩使愬有蒸嘗之潔愬當分閭之際終無內顧之憂者由此婦也今愬積行累功以致爵位六遷重鎮名列上台而韋氏猶限彛章未嘗思命一作開國甚不稱也因愬大名之邦式建小君之號可封魏國夫人

封烏重胤妻張氏鄧國夫人制

勅古者夫為大夫則妻為命婦況在小君之位未加大

國之封豈唯有廢徽章是無以

集作抑亦無

勸忠力也某官

烏重胤妻張氏以鳴鳩之德作合邦君輔成勲猷馴致
爵位雖從夫貴未授國封今以南陽本邦善地錫為湯
沐加號夫人茲乃殊榮足光閨閭可封鄧國夫人

封石雄妻索氏涼國夫人制 崔 嘏

勅西川貴族南國華容代有功勲門多閥閱早以懿德
媿于元臣既推內輔之才頗蘊中閨之德是宜䟽封表
貴開國旌賢蘭儀永配於金夫蕙問更光於石窀勉思

健婦以佐良人可封涼國夫人

中書侍郎同中書門下平章事陸宸妻渤海郡

夫人高氏進封燕國夫人制

錢 珣

勅命婦之寵數有四而國邑居其首主爵郎舉職勅請
必有舊章因以勸焉朕何敢愛具官陸宸妻渤海郡夫
人高氏高國族大稱於古者久矣冠冕就列尚想前脩
閨室有婦令聞令望一作門配君子而相敬承宗事以無

違鏘然和鳴信可偕老考祥之應已屬台臣守貴之謨
方資內助主爵之請孰云不宜他日中宮受朝則與伯
婦俱至佩玉相顧爾家盛哉非獨榮吾相之小君亦以
勸天下從夫之道也可依前件

內中齊國夫人扶風高陽郡夫人竝封婕妤樂
安郡新秦郡廣陵郡太丘郡雲安郡五夫人
竝加封秦晉楚越燕國夫人制

前人

勅朕既建中宮將聽內理法度方形於四德等威宜越
於九嬪齊國夫人某氏柔和有稟閑雅自持椒蘭讓薰
環珮爭潔近輦見欲辭之色攬衣懷必澣之心用是謙
勤保我恩澤重惟漢制遠采周官與名而大國重開錫
號而舊章復振勉脩懿範俾稱寵休共承陰教之端永
輔長秋之盛可依前件

封魏博節度使羅弘信妻越國夫人某氏進封

燕國夫人代州刺史傅瑤妻丘氏封吳興縣

君等制

勅具官某妻越國夫人某氏等據地圖總兵籍處邦君之位與夫持使節頒化條當牧守之任者理軍為政皆執善經而褒寵之謨亦多內助女師稟訓夫族稱賢不違柔順之規且習閑和之性或功庸克備風法有承或環珮之音周旋可聽是宜增大名之國開初命之封亦所以榮外臣而勉內助也可依前件

浙西節度使錢鏐燕國夫人吳氏進封晉國夫

人制

勃齊之壁司徒

左傳壁司徒主壘壁者

武力之臣也其妻有禮尚

獲錫地於君今師長萬夫提封千里內資淑媛助我勲
侯國進大名是惟舊典具官錢鏐妻燕國夫人吳氏肅
雍之美歲戒不忘聞雞鳴而致敬事姑諷鵲巢而思齊
有德輔成功烈諒屬柔明爰舉寵章載加常等勉承膏
澤以耀閨門可依前件

襄州節度使趙匡凝妻豫章郡君羅氏可進封

燕國夫人制

勅隨夫之爵考禮有文冊勲既集於藩維流澤可榮於

閨室

一作壺

具官趙匡凝妻豫章郡羅氏肅雍有美柔順

不違爰自和鳴克融懿範旁濟中權之盛實資內助之
勞致我良臣表于諸夏眷言淑德疏封未稱於宜家越
被舊章用典俾光於開國勉脩婦式無忽人倫可依前
件

武昌軍節度使杜洪妻晉國夫人進封秦國夫人

人制

勅經夫婦之本者莫近於詩故宜爾室家言稱也如鼓瑟琴言和也具官杜洪妻晉國夫人王氏贊洪守土宣力爰致顯爵爾以嘉耦之道遂能居而有之助彼藩條賴茲閨室宜室家而何媿鼓琴瑟以有聞仍命增封用旌柔順因吾肆赦是謂典常可依前件

鳳翔節度使李茂貞妻秦國夫人劉氏進封岐

國夫人制

勅封邑之制當列國甚貴矣其或舉茲重典進受大名
俾增伉儷之光以稱侯王之爵弘之在我宜者則行具
官李茂貞妻秦國夫人劉氏能脩懿範潛助元勲福雖
盛而心益恭封既大而勤不墮內言必正同獎自多贊
武幄之忠謀保魚軒之寵數而茂貞宣力守土在岐以
是加恩用彰有禮必使事君之節相勉克終則不獨宜
爾室家兼明報國可依前件

楊行密妻朱氏進封燕國夫人制

薛廷珪

勅具官楊行密妻朱氏作嬪藩翰宜爾室家六姻以寧
四德具美俾我行密為吾蓋臣統戎有方迷職無怠繫
爾輔佐致之輯柔慶澤所加序進惟允全燕列壤大國
䟽封式示寵榮以旌賢淑可進封燕國夫人

秦寧軍節度使葛從周母廣平郡太君宋氏進

封廣平郡太夫人制
錢珣

勅具官某母郡太君宋氏古者事親竭力而養樂於負

米信有其人今從周秩帶三公貴享十乘實賴嚴明之
訓以成忠信之名爾既承顏必盡無違之志吾方敦孝
遂加有典之勲一作榮可依前件

中書舍人苗深母瑯琊郡太君王氏封瑯琊郡
太夫人祠部郎中知制誥張文蔚母扶風郡
太夫人蘇氏封馮翊郡太夫人等制

劉崇望

勅具官苗深等母瑯琊郡太夫人王氏等本於仁原於

禮保於和處於順故圖史素學風法不衰立我彥臣率由貞訓而識者服儒之道不使忿言加已以羞其親深與文蔚有之矣乃子弟謹身之行履危懼辱之恩以承其志渙等有之矣且皆賦祿於朝相戒以養俾榮報德當貴䟽封慶集而家教行吾國古之孝理不在茲乎可依前件

許州節度使王蘊母趙氏進封楚國太夫人制

李
璣

勅古之為將言有老母而三戰三北者朕每讀其書而
非之夫為將者皆然則何以同在三之義勵士衆之心
而逃無勇非孝之譏哉苟如斯亦其母之未賢爾忠武
軍節度使王蘊方榮色養既孝而忠委以節旄遂稱名
將賈勇而力過投石臨陣而義不聞金得非其母趙氏
賢以善訓耶豈特築朱序之城寧陳嬰之族而已嘗錫
以郡夫人之號今蘊功業益進爵位益隆宜加大國之
封以助南陔之慶可依前件

郡夫人

進封賀蘭琬母楊氏弘農郡夫人制

蘇頲

門下太僕卿員外置同正員賀蘭琬母楊氏家臨桃塞
門映蓮峰賦蕢實於周詩承累葉於台相言成箴戒淑
慎其儀德憲圖史閑和其性正家貽則徙宅成規姻親
載隆寵章猶闕宜比絳紗之學用膺青綬之命可封弘
農郡夫人主者施行

封劉悟妻馮氏長樂郡夫人制

白居易

勅古者有冊名命婦賜號夫人蓋積善於閨門而受封於國邑也澤潞節度使劉悟妻馮氏傳芳茂族作合良臣成此忠貞之功因於輔佐之力禮從夫貴慶叶家肥俾開大郡之封以正小君之命可封長樂郡夫人

封宋叔康妻房氏河東郡夫人制

杜牧

勅詩稱鵲巢禮榮翟第既彰爪牙之效宜齊伉儷之榮
左神策軍護軍中尉兼左坊功德使特進左領軍衛大
將軍知內侍省事上柱國廣平縣開國侯食邑一千戶
宋叔康妻清河縣君房氏懿慈柔淑作配忠勲能潔蘋
繁克叶姻族成此內則穆其壺風稱為令人實光婦道
爰䟽封爵用舉典章可服寵榮勉於輔佐可封河東郡
夫人

封吐突士暉妻鴈門郡夫人制

前人

勅詩美夫人禮稱內子允膺腹心之任宜崇家室之榮
弓箭軍器等使特進行右領軍衛大將軍知內侍省事
上柱國陰山縣開國公食邑一千五百戶吐突士曄妻
咸陽縣君田氏生於富貴作配忠貞柔婉自卑儀範可
則職勤賓祭道睦姻親既諧閨門克成婦德爰加禮秩
之貴以彰輔佐之勤榮我疏封無忘內助可封鴈門郡
夫人主者施行

翰林學士兵部侍郎盧說妻博陵郡君崔氏進

封博陵郡夫人制

錢珣

勅為人之婦能從其爵以益貴者是必宜其家矣而階品在三等之設有銀印青綬之崇則從爵之名所增益貴具官盧說妻博陵郡君崔氏族大多聞多聞者風法性成不易不易者柔和勉說代我之言必能恪居其職助於內者足以彰焉是謂宜家可當用典展衣之飭不其盛哉可依前件

郡君

泰寧軍節度使葛從周妻清河縣君張氏進封
清河郡君制

勅具官葛從周妻清河縣君張氏生自良家配吾戎帥
頗能佑助克濟功名柔順睦親內則有聞於宗族溫恭
近禮外言不出於閨房既屬推恩是宜用典進之郡邑
俾稱蕃侯可依前件

太君

石門扈駕功臣六都指揮使檢校司空孫德威

母博陵崔氏封博陵縣疑太君制

劉崇望

勅具官某母崔氏夫為人者能以忠勇之謨勞于國戎
旅之權既重上公之秩仍高而母氏之封寵章未稱則
於王化有所不弘方屬推恩是宜用典以光孝養且厚
勲臣可依前件

縣君

封竇澣等母邑號制

崔 嘏

勅古者男子生則射以桑弧蓬矢蓋取欲使有事天地
四方也及長而貴則光其六姻况堂高有親當室自立
不有嘉命曷彰令儀具官竇澣等母某氏或以衣冠胄
胤或以勲績緒餘皆知訓子之方早識從夫之義爰因
濡澤各俾增封式示恩榮用光閨閭可依前件

文苑英華卷四百十九

欽定四庫全書

文苑英華卷四百二十

宋

李昉等

編

赦書一

登極赦書

睿宗受禪制

蘇頌

門下天下神器非上聖無以運其機域中大業非元良
無以固其本欽若靈命寅奉神宗屈已順人用安四海
承祧主鬯實貞萬國頃者家臻大憫在疚惟憂梟獍滿

衢豺狼塞路武職戎政必任凶族國要時權咸升逆黨
社稷之守但望苞桑忠義之懷誰期艾棘階禍稔惡伺
隙乘間煩言碎辭所不勝述皇太子隆基正氣凝姿端
命毓德自家刑國英徽日甚移孝為忠雄謨電發北軍
馳入掃欃槍於紫微南宮反正開日月於黃道平亂寧
國翼戴朕躬一旅不勞功逾復禹七德咸舉事邈興周
聲應吹銅望當歸璧令司空讀冊侍中授璽寶由立義
豈曰尚親承華肇開元嗣以建方流樂風之緒宜申游

雷之澤朕爰初踐極喜氣呈祥天人叶心象緯昭貺官
名有紀年號用憑可大赦天下

睿宗受禪制

唐大詔令
作即位赦

內制

門下朕聞自古帝王光膺圖錄則尊尊親親之義著于
典謨諒在至公盖非獲已我大唐乘時撫運累聖重光
當四海之樂推受三靈之眷命大行皇帝奄棄寓縣痛
結仇讐朕志掃巨逆保寧嗣主今皇帝哀覽在疚託于
朕躬勤懇再三願成茲意朕以不德猥承丕緒念今追

昔載感于懷若涉大川罔知攸濟思荷宗祧之業屬此
惟新式揚渙汗之恩與之更始可大赦天下

開元皇帝受禪制

門下繼明嗣德王者所以承天尊祖奉先聖人所以崇

孝

闕

上之禮著乎重華月朔之祠襲乎文命猗歟作頌

發流濬哲之祥清廟升歌思表配天之業歷選前載可
得而言我國家首出開元繼文膺統七代觀德至道洽
於生人三后在天垂裕光於後嗣太上皇帝道超寰表

功軼帝先名言不測於乾行仁智不知於日用累讓神
器非以黃屋為尊俯膺大寶蓋為蒼生屈志黎人於變
淳化斯登載懷脫屣疇咨菲薄竭讓德之志天眷莫迴
陳拜一作邦非首之誠中襟逾邈遂以寡昧祇踐宸居循顧
紹庭載深寅畏爰撰初吉躬展肅雍虔肆獻之儀申大
號之典神保之饗斯洽介福之道攸宣億兆同歡人祇
同慶恭承聖訓申茲霈澤可大赦天下

大中十三年十月九日嗣登寶位赦

編制

門下朕聞龍之騰天漢也則必乘風雲鼓雷電以震

詔令

作需非

六合君之踐大寶也則必敷仁惠煥號令以煦萬

方是以地不間於幽遐事罔論於輕重洪聖興而皇渥

溥德音振而庶類蘇故愆咎咸除枯沉盡起斯皆前代

令典國朝成規委轡諒戒於惠奸凝命

詔令作旒

始懷於布

澤肆

詔令作顧

予寡德嗣續丕圖夙夜乾兢若俯泉谷永惟

我高祖太宗之艱難締構又惟我列聖之慈儉統承思

所以克紹休明弘濟億兆剷眚俗之弊清理化之原肇
祥導和應天順物致驩心於率土知恭己以臨人爰申
在宥之恩用洽惟新之慶可大赦天下自大中十三年
十月九日昧爽已前大辟罪已下罪無輕重已發覺未
發覺已結正未結正繫囚見徒常赦所不免者咸赦除
之惟犯十惡叛逆及故殺人官典犯贓及持杖行劫並
不在此限其故殺人者已傷未死已死更生意欲殺傷
偶得免者並同已殺人法處分又刑獄之內官吏用情

推斷不平因成冤獄無問有贓無贓不在原免之限在降官量移近經量移者更與量移其合復資者五品以上中書門下即與處分六品以下仍依常例選集丁憂去任及在憂制受貶者服闋日亦與量移如有親故在上都任經所司陳狀便與處分不必更待本州府申請其別勅因責受降資正官及曾因忤累停免未經引用者並與進一作追改流入配隸及別勅安置不問道俗及已到未到者並與量移近處先已再經量移者仍並放

還流貶人中從元勅云雖逢恩赦不在量移之限或長
流及充百姓終身勿齒者並與中書門下量與收叙處
分及量移近處如已亡歿家口欲還及須歸葬者聽隨
所在

此字無

便如緣葬事幼弱饑窮不能自濟者委所在

長吏量給棺槨優恤發遣坐累歲深加刑已衆累經赦
令久未該恩用弘開網之仁俾釋向隅之戚應元和末
惡黨前後處斷人數已多自今已後宜一切不問先有
勅令追捕未獲者亦更不復追獲應先關連上件配流

人并家口等縱元勅云長流充百姓雖逢恩赦不在量
移及放還限者並與量移近處如到流所經六載仍並
放還如已亡歿家口欲還並准前流人等例處分天德
五城流人負罪素重元勅未經十載不得放還今屬鴻
恩頒令沾及宜減三年如年已滿便放還如情愿便住
者亦聽在降官及流人先有官者如有亡歿各還本官
亡官失爵痕累禁錮者並從洗滌唯自今年八月九日
已後坐事流貶並不該此新恩之限營奉園陵所資發

未備慮其科率困撓黎元應緣山陵制及喪儀禮物宜
委中書門下及諸官之長講求故實必誠必信務遵遺
旨用副朕懷所緣山陵用度近已出內庫及戶部錢物
克給應緣人夫功價宜各速令所司以不折估匹段兼
見錢分數支給不得令侵屈百姓山陵未畢情禮有異
其降誕進奉宜且權停志方思於遂物心匪樂於從禽
止備蒐畋所宜節減諸道進鷹鷄每年共許進二百聯
仍選擇堪處進奉餘悉放免貢獻無藝物力難充華靡

不除時風豈厚諸道節度觀察使除大例合貢獻外不得別有進奉雕文刻鏤及異色綾錦難得寶貨一皆禁絕京畿賦役頗繁河洛凋瘵亦甚欲其綜疑息當在蠲除京兆府今年秋青苗錢宜每貫量放五百文所放錢如是府司占留色目即委戶部准舊例據數支填不得令有虛折其大中七年已前百姓積欠兩稅斛斗及青苗權酒井稅草職田麴麪棘等徵收不得空繫簿書亦並放免如在官典所由腹內不在此限河南府今年秋

青苗錢宜每貫量放三百文如是府司占額錢數亦委戶部准例支填應人積欠府司及度支戶部鹽鈔諸司大中七年已前諸色錢物斛斛銀錫草等如身已逃亡及身在貧窮家業蕩盡頻經校料終無可徵納者宜並放免如在主掌人吏所由腹內者不在此限逋負年多徵攤力竭咸令已責庶可惠貧度支戶部鹽鈔三司應收管在城及在府州并諸色場鹽大中七年已前欠負諸色錢物斛斛等除官典所由請領官錢和糴市及在

場官招商所由腹內外其餘人戶所欠錢物如身家已
亡歿或在貧窮家業蕩盡無可徵納并逃竄捕捉未獲
囚繫妻男攤徵保人等如此之類虛掛簿書中無填納
之日宜并放免如聞後赦令蠲免放欠負所司不及時
處分元係簿書徒有蠲免之名却為分外攪擾今所放
錢物宜各令本司差辦事官典據年額人戶姓名所欠
錢物色目檢勘便下文帳不得更起條樣勘逐所徵可
放生事擾人仍令所在場鹽院及州縣於要畧分明懸

榜示人戶俾令知悉仍仰所司各限月日處分訖具所放錢物單數分折聞奏災沴流行黎甿困窘免其租稅漸冀輯寧諸道州府有遭水損甚處其今年各納苗稅錢等委長吏酌量蠲放如大中十二年已前欠負兩稅米在百姓腹內徵收不上者亦宜特放其實遭災沴處仍具折聞奏聞抱器逢時諒恩展用卑棲疏迹能不懷嗟如聞中外官僚或有滯屈雖限以員闕致此因循而念其考歷孰非勤舊宜可中書門下各量才分漸與選

改廣我四聰在於多士才弘景化思拜昌言諸色人若
上封事極言時政得失有官司者官吏長收狀聞奏無
祿位者任自投匭進狀當必親覽須務體國公言不得
用情謗訕每想候封歲思於荒稔莫非玉土物合通其
有無諸道州府閉糴禁錢頗為弊事前後赦勅累有條
具尚恐因循依前壅塞宜委出使郎官御史切加察訪
如有違越即具奏聞叛徒相扇既已翦除屬類潛逃宜
從寬宥湖南江西嶺南宣歙等處去年所遭狂寇擾亂

尚恐軍人百姓至今未安如先有為患

一作惡

者關連親

族或逃竄尚未復歸今一切不問仍各委本道長吏分明曉諭切加招誘安存勿令疑懼如百姓曾經被賊俘劫錢物官與收獲得者仰分明勘認本主給還勿使曖昧欺隱仍具分折聞奏如聞京城內富饒之徒不守公法厚利放債損陷飢貧前後累有勅文約勒非不丁寧無良者都不遵守致貧乏之人日受其弊宜令京兆府准寶歷三年四月二十日及開成二年八月二日勅文

切加提舉曉諭嚴切約勒處分凶險之輩情狀難容如
聞將吏傭保奴僕之徒或因愆過發遣之後輒生怨謗
捃拾本使及郎主細微之事意在僥求苟無所得便成
恐脅或闇投無主文字或擅進文狀此若不絕交害平
人自今已後宜準律文及大中二年九月十日及大中
六年八月二日勅便於當處焚燒所由不得收領及與
聞奏其擅進文狀宜勘責重加科誡如所由固違勅文
不焚燒所投文書尚敢將出當與告訴者同罪其容修

文狀挾奸蠹者委臺府及諸軍諸使切加訪察如有此
色便捉獲送府縣推問須令痛懲天下州郡於所公用
之餘收糴年谷自備水旱以救疲人賑絕及時免待奏
請探聞惠物頗謂通規今年正月一日赦文但令不別
置倉廬煩別差官吏主當所以令寄常平義倉任自分
別支用如聞所在州郡未能盡諭詔旨袞入常平義倉
縱遇年豐不務糴歛謬為廢閣切在舉明令所在州郡
細詳今年正月一日赦條處分其刺史去任日仍委本

道觀察使便以在任日所收貯斛斗多少支數以為考課言念士子祿以代耕選人例迫饑寒遠赴調集頻年被駐情實可矜宜令吏部准今年正月一日赦文處分廣敬坤儀當舉推恩之典垂仁盤石在霑霈澤之榮太皇太后及元昭皇太后第二等以上親委中書門下量才叙用大長公主嗣王各與一子出身九廟子孫陪位者普恩之外各加兩階無官者各賜勲兩轉仍據使主封後與一人出身委宗正司卿檢詳圖譜一房最沉翳

者充數具名奏聞宗子中有行義可稱才幹足用者亦

委搜採

一作擇

具名銜事狀送中書門下量才叙用內外

文武見在及致仕官三品已上賜爵一級四品以下加
一階仍賜勲兩轉應入三品欠一考未足者考足日聽
叙致仕官量與改轉依前致仕弼諧萬物鎮靖四方洎
于文武具寮咸宣忠力並稟義方之訓宜推錫賚之恩
追飾寵光式彰孝理中書門下及諸道節度使帶平章
事祖父母亡歿未經追贈者並與追贈已經追贈者更

與改贈東郡留守諸州府長官在京及分司常叅官神策衛金吾六軍統軍將軍四衛十二衛將軍威遠營鎮國軍等使父母亡歿未經追贈者並與追贈品秩已崇請迴贈祖父母者亦聽父在無官者量與致仕官父歿母存量與已有邑號者量與進改竭力扶危捨生取義不旌後嗣曷表遺忠故尚父汾陽王贈太師晟贈太尉秀實子孫中各與一人正員官張巡許遠南霽雲顏真卿杲卿子孫中各與一人出身祇奉典冊誠禮無違宜

被優恩以酌厥効即位日攝太尉奏詞中書令讀冊侍
中進寶承旨宣制奏外辦禮畢各與一子正員七品官
奉寶書綬讀冊及書玉冊官各特加一階書寶押寶授
舉昇寶冊官溥恩之外加兩階合選人減一選其餘應
職掌人行事及寫制令太常條選儀注等官三品已上
更賜爵一級四品加階仍賜勲兩轉中書門下儀制官
內侍省內教各特加一階鑄造玉冊並填金字造寶裝
寶冊人等各賜物五十段承顧命撰制冊文及寫制官

並已有昇其餘自八月九日至十三日諸寫制誥官各加二階大明宮留守及緣國慶告郊廟太清宮行事官三品已上賜爵一級四品以下加一階應緣崇冊太皇太后及追謚元昭皇后冊禮職掌行事官及鑄造冊寶填金字人等節級賜物周詩歌白馬之客魯國闡素王之風尚德崇儒宜旌胄裔二王三恪文宣王子孫各與一子出身藩邸臣寮誠勤久著各加優獎用示恩榮鄴王府官今年八月九日已前在任者五品以上並與進

改六品以下所司非時與分流外番考已足未足並放
入流內侍省及鄆王府官三品已上賜爵一級四品已
下加一階五品以下賜勲兩轉八月九日至十三日北
內當上及從駕者四品以下溥恩之外賜爵一級五品
以下更加一階自身更賜勲兩轉神策六軍金吾威遠
皇城將士三品已上賜爵一級四品以下加一階仍並
賜勲兩轉馳奉章奏分居職役冊勲進級甄彼勤勞諸
道進奏官及緣國慶奏表到京者溥恩之外各加一階

仍賜勲兩轉翰林侍詔并諸色直長及供奉人等三品
以上賜爵一級四品以下加一階無階者賜勲兩轉飛
龍閑厰宮苑典引掌扇內園總監裁接少府將作中尚
書武德軍器內外弓箭庫等諸使下白身及無品直司
定額長者雜匠巧兒黃衣長上監門直長雜仗二衛七
色引執駕細引執扇角手挈彊騎武士天文觀生歷生
漏生典鼓工人樂人主膳主酪典食手宰手掌閑幕士
駕士御醫工獸醫門僕樂童御書手流外行署等賜勲

兩轉宿陳仗衛師旅有勞委質蕃方偏裨著郊咸加獎
賚庶給恩榮應赴御樓立仗神策六軍金吾威遠及皇
城等將士宜准舊制量賜錢帛其神策軍應在畿內鎮
將亦各賜物有差應諸道將校三品以上賜一級四品
以下加一階無階賜勳兩轉遠人慕義上國貢獻將表
懷柔俾霑寵錫鴻臚禮賓院蕃客等各賜物有差禮經
重於問年宜加廩餼王化存於勸善用激里閭天下耆
老八十已上者各賜絹兩疋粟二石九十以上各賜絹

三疋粟米五石並以上供錢常平義倉粟充給仍令令
長親致縣庭宣詔頒賜不得委人吏致有欺隱其九十
以上者仍加板授孝子順孫義夫節婦旌表門閭終身
勿事先有旌表者準耆老例優賜除弊安人由於制命
寢而不用致理良難大中以來頻有赦令有司廢閣多
不遵行宜委中書門下檢尋提舉有便於人者次第施
行或有事理未盡不便於人者仍委中書門下及所在
長吏條具聞奏其法詳斷刑獄今年正月一日赦書已

有條具處分仍本司切加提舉遵守施行不得輒有隳
紊峻極靈長効祥興利俾申祀典以達明誠五嶽四瀆
名山大川各委本道長吏以禮致祭亡命山澤挾藏軍
器百日不首服罪如初赦書有所不該載者所司明作
條具聞奏敢以赦前事相告言者以其罪罪之赦書日
行五百里布告遐邇咸使聞知主者施行

文苑英華卷四百二十

欽定四庫全書

文苑英華卷四百二十一 宋 李昉等 編

赦書二

改元赦書

改天監元年赦詔

沈 約

門下五精迎襲皇王所以受命四海樂推殷周所以改
物雖禪代相舛遭會異時而微明迭用其流遠矣莫不
振民育德光被黎元朕以寡闇命不先後寧濟之功屬

當期運乘此時來同

梁書作因

心萬物遂振厥弛維大造區

夏永言前蹤義均慙德齊氏以代終有徵歷數云改欽

若前載集大命于朕躬顧惟菲德辭不獲命寅畏上靈

用膺

梁書作應

景業執禋柴之禮當與能之祚繼迹百王君

臨四海若涉大川罔知攸濟洪基初兆萬品權輿思俾

慶澤覃被率土可大赦天下改齊中興二年為天監元

年賜民爵二級文武加位二等鰥寡孤獨不能自存者

人穀五斛逋布口錢宿債勿復收其有犯鄉論清議贓

汙淫盜一皆蕩滌洗除前注與之更始長從勅繫之身
特皆原遣亡官失爵禁錮奪勞一依舊典

開元元年赦書

蘇頌題

黃門朕聞聖人無心同於吹萬上皇有道契於明一居
天下之尊者莫大體其大以照臨成天下之務者至公
順其公以康濟故能稽昌厯考元符通于神祇格于上
下鴻名不可以深拒盛典不可以固違斯豈在予而徇
於物也朕以菲德丕承聖訓掃除機槍保衛宗稷內問

安以承志外聽理以推誠始自朝廷納之以軌物終加
蠻貊洎之以聲教欲令跂行喙飲含齒戴髮去其天札
蠲其疵癘每兢兢於紫座寧自貴於黃屋而凡我羣辟
顧斯兆庶以為人謀協從天意欽若王者人所歸也帝
者天之號也歸之者以德號之者以功然號以功成則
功不可以不表歸以德厚則德不可以不勵朕猥屬與
能之運遂忘冲讓之私將逮臨一作建寅之歲首甫擇建
子之天統是用發揮景命受茲禮冊夫循名者責實謀

始者慮終勉而全之非敢自滿所以克已思政惟懷永
圖懼弗勝荷用多慙惕赦令所作其來尚矣是則姦人
之幸嘗思奔馬之喻朕但欲令其畏惡化之為善庶比
屋可封豈開羅為惠朕之此志每用形言頃屬一作自填冬

序頗愆農功

一作澤

洎簡辰練日有司備禮則上天同雲

北風雨雪意者將乘廣慶必待湛恩宜行

一作憑

宥過之

典以叶隨時之義可大赦天下改先天二年為開元元
年十二月一日昧爽已前大辟罪已下已發覺未發覺

已結正未結正繫囚見徒咸赦除之云云禮尚於儉書

誠於奢朕方

闕

敦朴以存勸沮至於乘輿服御及土木

之功蠲除樽節貴從簡省王公已下宜識此心欲將先

自朕躬冀能化行海內薛伯陽以凶魁之子合寘嚴刑

緣尚主之恩特令遠貶旋念從夫之禮深矜自我之出

宜復舊婚再承新命可唐州別駕員外郎置同正員郭

元振往立大功保護於朕頃因閱武頗失軍器容責情

放逐將收後效可饒州司馬員外置同正員朕聞罪不

相及先王之制叔向豈同

一作坐

於凶弟展禽見稱於哲

兄劉廙不以劉偉獲辜王導不以王敦廢職崔滌為其

兄湜構禍每進款誠事朕有年心則無隱忠邪既判賞

罰宜均俾踐儲卿式彰臣節可太子僕員外置同正員

國初以來宰相及實封功臣子孫一房沉翳未承恩者

令所司訪擇有可

一作才

用者量加擢用周朝酷吏來俊

臣周興之徒殘害宗枝毒害良善永言及此深所痛

一作

歎恨其酷吏有身在及酷吏身後有子孫亦令所司勘

會甄別處公諸軍將士有年歲深久所由要籍或不得
選集及未叙勞効咸委軍將據實奏聞仍令所司早賜
處分及諸軍將佐總管以上自今已後冬正束帛一準
京官例給亡命山澤挾藏軍器百日不首復罪如初敢
以赦前事相告言者以其罪罪之赦書日行五百里布
告遐邇咸使知聞主者施行

一作皆唐大詔令

改元天寶赦

內制

門下古先哲王之致理也皆上順天心下稽人事時令

贊發生之重

一作德

祥

一作靈

符叶紀年之稱考彼前載斯

為

一作馬

大猷恭惟烈祖玄元皇帝天寶錫慶象帝之先

垂裕後人重光五聖自朕嗣守丕業洎三十年實賴宗

社降靈昊穹孚祐萬方無事六府維脩寰宇晏然

一作如

庶臻于理然則乾元在上仁覆為首皇王臨下惠化攸

先思弘善貸用廣滋

一作慈

育尊道寶之

一作而

建元暢玄

風於不宰况屬陽和布氣獻歲發生宜覃在宥之恩式

降維新之澤可大赦天下改開元三十年為天寶元年
自天寶元年正月一日昧爽已前大辟罪已下罪無輕
重已發覺未發覺已結正未結正繫囚見徒常赦所不
原者咸赦除之諸色左降官并其流人未經量移者亦
與量移禁虜郢以遂生成自今已後每年春天下宜禁
弋獵採捕如聞百姓之內或有戶高丁多苟為規避父
母見在乃別籍異居宜令州縣勘會其一家之中有十
丁已上者放兩丁征行賦役五丁以上者放一丁即令

同籍共居以敦風教天下侍老八十以上者宜委州縣
官每加存問仍量賜粟帛侍丁者令其養老孝假者矜
其在喪此王政優容俾申情理而官吏不依令式多雜
役使自今後不得更然國之急務莫若求才頃者雖屢
搜揚士庶尚慮遺逸更宜精訪以副虛懷其前資及白
身人中有儒學博通及文詞秀逸或有軍謀越衆或武
藝絕倫者委所在長官具以名薦若乃弘我風化實惟
方岳必佇其人以膺共理其京文武官五品以上清資

并郎官據資歷人才堪為刺史者各任封狀自舉但文
宣垂訓事必正名而黃鉞古來以金為飾金者應五行
之數有肅殺之威去金稱黃理或未當其黃鉞宜改為
金鉞符威武之義焉内外文武九品已上各賜勲兩轉
前王重典在乎祭祀况屬維新事宜昭告五嶽四瀆名
山大川諸靈迹及自古帝王忠臣義士並令所由本州
縣致祭

一作皆唐大詔令

奉天改元大赦制

陸贄

門下致理興化必在推誠忘己濟人不愆改過朕嗣守

詔令
作服

丕構君臨萬方

詔令
作邦

失守宗祧越在草莽不念率

德誠莫追於既往永言思咎期有復

詔作
補

於將來明徵

厥初

舊唐書
作其義

以示天下惟我烈祖邁德庇人致俗化於

和平拯生靈於塗炭重熙積慶垂二百年伊爾卿尹庶

官洎億兆之衆代受亭育以迄于今功存于人澤垂于

後肆予小子獲纘鴻業懼德不嗣罔敢怠荒然以長于

深宮之中暗于經國之務積習易溺居安忘危不知稼

穡之艱難不察

唐書作卹

征戍

詔令作戍役

之勞苦澤靡下究情

不上通事既壅隔人懷

集作情

疑阻猶昧省已遂用

詔令作致

興戎徵師四方轉餉

文粹作運

千里賦車籍馬遠近騷然行

齋居送衆庶勞止或一日屢交鋒及或連年不解甲胄

祀奠

詔令作典

乏主室家靡依生死流離怨氣凝結力役不

息田萊多荒暴命

唐書作冷

峻於誅求疲氓空於杼軸轉死

溝壑離去鄉閭邑里丘墟人煙斷絕天譴於上而朕不

寤人怨於下而朕不知馴致亂階變興都邑賊臣乘釁

詔令肆逆滔天曾莫愧畏敢行陵逼萬品失序九廟震

驚上辱於詔令祖宗下負於詔令黎庶痛心覲貌詔令

作罪累在予永言愧悼詔令若墜泉谷賴天地降祐人

神唐書叶謀將相竭誠爪牙宣力屏除詔令大盜載張

皇維唐書將弘永圖詔令必布新命詔令

朕晨興夕惕惟念唐書前非乃者公卿百寮累詔令抗

章疏詔令猥以徽號加於朕躬固辭不獲俯遂輿議昨

因內

文粹作循

省良用矍

唐書作矍集作懼

然體陰陽不測之謂神

與天地合德之謂聖顧惟淺昧非所宜當文者所以化

成武者所以定亂今化之不被亂是用興豈可更徇羣

情苟膺虛美重余不德祇益懷慙自今以後中外所上

書奏不得更稱聖神文武之號夫人情不常繫於時化

大道既隱亂獄滋豐朕既不能弘德導人又不能一法

齊衆苟設密網以羅非辜為之父母實增愧悼今上元

統歷獻歲發生

唐書作祥

宜革紀年之號式敷在宥之澤與

人更始以

文粹
作用

答天休可大赦天下改建中五年為興

元元年自正月一日昧爽已前大辟罪已下罪無輕重
已發覺未發覺已結正未結正繫囚見徒常赦所不原
者咸赦除之李希烈田悅王武俊李納等有以忠勞任
膺將相有以勲舊繼守藩維朕撫馭乖方信誠靡著致
令疑懼不自保安兵興累年海內騷擾皆由上失其道
而下罹其灾朕實不君人則何罪屈已私物余何愛焉
庶懷引慝之誠以洽好生之德其李希烈田悅王武俊

李納及所管將士官吏等一切並與洗滌各復爵位待之如初仍即遣使分道宣諭朱滔雖與賊泚連坐路遠

未必同謀朕方推以至誠務欲弘貸

唐書作永念舊勲務在弘貸

如

能効順亦與維新其河南河北諸軍兵馬並宜各於本

道自固封疆

詔令作土

勿相侵軼朱泚大為不道棄義蔑

詔令

作滅

恩反易天常盜竊名器暴犯陵寢所不忍言獲罪祖

宗朕不敢赦其應被朱泚脅從將士官吏百姓及諸色人等有遭其扇誘有迫以克威苟能自新理可矜宥但

官軍未到京城以前能去逆效順及散歸本軍本道者
並從赦例原免一切不問天下左降官即與量移近處
已經量移者更與量移流人配隸及罰藩鎮効力并緣
罪犯與諸使驅使官兼別勅諸詔令州縣安置及得罪
人家口未得詔令歸者一切放還應先有痕累禁錮及
反逆緣坐承前恩赦所不該者並宜洗雪亡官失爵放
歸勿齒者量加收叙未復資者更與進叙人之行業或
未必兼構大厦者方集於羣材建奇功者不限於常檢

苟在適用則無棄人沉黜免之人沉鬱既

文粹作頗

久朝過

夕改仁何遠哉流移降黜亡官失爵配隸流人等有才能著聞者特加錄用勿拘常例諸軍諸使諸道赴奉天

及進收京城將士等或百戰摧敵或萬里勤王扞固全

文粹作金

城驅除大憝濟危難者其節著復社稷者其業崇

我圖爾功特加彝典錫名疇賦永永無窮宜並賜名奉

天定難功臣身有過犯遞減罪三等子孫有過犯遞減

二等當戶應有差科

詔令作偶

使役一切蠲免其功臣已後

雖衰老疾患不任軍旅當分糧賜並宜全給身死之後
十年內仍回給家口其有食實封者子孫相繼代代無
絕其餘收錄及功賞條件待收京日並準去年十月十
七日十一月十四日勅處分諸道諸軍將士等久勤扞
禦累著功勲方鎮克寧惟爾之力

詔令
作績

其應在行營者

並超三資與官仍賜勲五轉不離鎮者依資與官賜勲
三轉其累加勲爵仍許回授周親内外文武官三品已
上賜爵一級四品已下各加一階仍並賜勲兩轉見危

致命先哲攸貴掩骼埋胔禮典

詔令作經

所先雖効用而

詔令

之作或殊在惻隱而何間諸道兵士有死王事者各委所

在州縣給迺送歸

詔令作赴

本管官為葬祭其有因戰陣殺

戮

詔令作捕

獲伏辜暴骨原野者亦委所在逐近便收葬應

緣流貶及犯罪未葬者並許其家口各據本官品以禮

收葬自頃軍旅所給賦役繁興吏因為姦人不堪命咨

嗟怨苦道路無聊汔可小康與之休息其墊陌及稅間

架竹木茶漆權鐵等諸色名目悉宜停罷京畿之內屬

此寇戎攻劫焚燒靡有寧室王師仰給人以重勞特宜
減放今年夏稅之半朕以克醜犯闕遽用于征爰度近
郊息駕茲邑供儲克辦師旅攸寧式當褒旌以志吾過
其奉天宜昇為赤縣百姓並給復五年尚德者教化之
所先求賢者邦家之大本永言茲道夢想勞

集作增

懷而

澆薄之風趨競不息幽棲之士寂寞無聞蓋誠所未孚

故求之不至天下有隱居行義才

集作道

德高遠晦跡丘

園不求聞達者委所在長吏具姓名聞奏朕當備禮招

致諸色人中有賢良方正能直言極諫其博通墳典達

於教化并識洞韜鈴堪任將帥者委常叅官及所在長

吏間薦天下孤

集作
者

老鰥寡惇獨不能自活者並委州

縣長吏量事

詔令
作加

優恤其有年九十已上者刺史縣令

就門存問義夫節婦孝子順孫旌表門閭終身勿事大

兵之後內外耗竭貶食省用宜自朕躬朕當損

詔令
作節乘

輿之服御絕宮室之華飾率已師儉

集作率
以節儉

為天下先

諸道貢獻自非供宗廟軍國之用一切並停應内外官

有冗員及百司有不急之費委中書門下即商量條件

停減聞奏布澤

詔令作思

行賞抑惟舊章今以餘孽未平帑

藏空竭有乖慶賜深愧于懷赦書有所未該者委所司
類例條件聞奏敢以赦前事相言告者以其罪罪之亡
命山澤挾藏軍器百日不首復罪如初赦書日行五百
里布告遐邇咸使聞知

興元二年改為貞元元年正月一日大赦天下

制

門下王者體立元極欽若乎天地纂業承統嚴奉乎祖

宗所以敬事修誠務本敦孝尊其上以御于下謹其身

而訓于人百神允諧

詔令作懷

兆庶永賴立國之本斯其大

經

詔令作國之大典莫重於斯

朕燭理不明違道招損往遭大

集作多

難淪陷國都天地宗祧曠而莫主是則欽若嚴奉之義

缺矣朕甚懼焉洎再

集無再字

復京師遽將告謝有司以人

力耗數禮物廢墜

詔令作臨

日居月諸歲聿云暮卜其近日

俯

詔令作甫

在上春齊心永懷坐以待曙而百辟卿士抗疏

詔令上言咸謂人心未寧不足以盡敬寇孽猶在不足

作表
詔令可以造功迫於羣情俯仰詔令誠願郊廟孔邇瞻言

作可莫定悼心慙顏胡寧自處重以和平未洽灾沴荐臻去

歲旱蝗兩河為甚人流不息師出靡居加之以徵求因

之以荒饑困窮餒殍轉死丘墟而又關輔之間冬無積

雪土膏未發宿麥不滋詳思咎徵有為而致詔令作其

豈兵戎之後餘梗詔令尚存將獄犴之中深寃未釋詔令

作又河左詔令淮右逆將詔令阻兵汙脅齊人陷之死

地雖欲自雪厥路無由抱義銜冤足傷和氣此皆由

集作

自朕爽

詔令作寡

德播災于人為之父母實用愧耻今玄陰

已謝春日載陽勾萌畢伸幽蟄咸震思與海內同心自

新發號

詔令作布澤

更元用符天意宜改興元二年為貞元

元年自正月一日昧爽以前大辟罪已下已發覺未發

覺已結正未結正繫囚見徒罪無輕重咸赦除之應在

河中脅從將士多是奉天赴難功臣本居朔陲夙尚忠

節豈以一夫誑誤棄其累代勲庸朕於此軍尤所不忍

特宜洗滌待以初誠自非與官軍決戰死於鋒刃其餘

雖臨戰

詔令作陣

擒獲亦並

詔令作便

釋放如舍

集作棄

逆歸順者

在身先有官爵實封一切如舊仍準前後制勅所在便

給賞錢并與甄叙如有因危効節建立殊庸量其事蹟

特加獎擢李懷光若能翻然悔

詔令作改

過束身赴闕

詔令作朝

念其嘗有大勲必當終始全護仍準前勅授之官封朕

於功臣庶亦無負淮西將吏百姓等有被刼制久為匪

人詢事原情諒非獲已今王師四合計日誅夷玉石同

俱一作焚用增惻憫宜令諸道進軍之日唯罪首惡一人

自餘徒黨悉從原宥如有歸明

詔令作順

及立功者並準河

中將士例褒獎為國之要在於審官共理分憂守宰彌

切闔境性命繫乎其人將使里閭無愁苦之聲風俗興

廉讓之教得不慎東髦彥寄之化源自今已後諸州刺

史有闕中書門下於朝官中精擇有理人才術者授之

如刺史縣令在任頻年課績尤異

詔令作著

者擇授給舍郎

中

詔令作擢侍郎給舍官侍

御史中外迭處用觀其能賞罰必行期

于競勸自頃選曹署吏唯以書判求人務騁浮華莫詢
詔令實行且能言者不必適用蘊用者或未能言為官
作稽

擇人其在精覈宜令清資常叅官每年於吏部選人中
各舉所知一人堪任縣令錄事叅軍者所司依資叙註
擬便於甲厯之內具標舉主名銜仍牒報御史臺如到
任後政理尤異及有贓犯事蹟明著者所司錄舉官姓
名聞奏以為褒貶其內外官員及京城諸使名目委御
史審勘會商量并省停減仍集百寮定議務從
詔令簡
作欲

約息費使人其京官外官職田及利息官錢等或點吏
詆欺移易墾畔或貧人從徙捕繫親隣日月滋深耗弊
彌甚亦令百寮議其折衷擇善而行往以賦役殷繁人
不堪命定為兩稅事頗易從比屬兵興或踰始制法無
所守吏益為姦哀我勞人汙可小息其諸州府除兩稅
外應有權宜科率差役一切悉停京畿及側近州縣所
欠百姓科詔令作和市和糴價直委度支即勘會支給諸道
非臨寇賊州縣自去冬已來新點召詔令作名官健子弟等

並宜放散任營生業應經陷賊州縣百姓屋宇被焚毀
并貧病老弱及遭傷損之類所在量加優卹使得安存
天下名山大川并自古聖帝明王賢臣烈士祠廟墳墓
各委當處長吏擇日致祭必資精潔以達至誠班爵有
差所以叙賢也廩秩有等所以明勸也今或高卑失次
中外相踰至於卿士之家尚羅凍餒之患忠信重祿豈
其然耶内外官祿及俸錢手力雜給等委中書門下與
度支即叅詳定額聞奏應赴奉天及收城將士等並功

存社稷節著艱危中心藏之豈忘酬報頃緣府藏空竭

賞給未周

集作充

乃眷勲臣實用增愧應準元勅合請賞

錢人等委所司節減宮內及百司費用據所支

集作有

財

物速與給付

集作支給


應在京城及諸道立功將士等先有

詔旨並許甄昇所司勘會淹歷時月委中書門下即與

處分諸軍行營并河中朝邑被脅從將士家口在京及

諸州府者宜令本道節度觀察使常存賑卹各令優給

應諸軍諸使立仗見在城將士等共賜物七萬疋云云



文苑英華卷四百二十一